

C2. As Cortes de Cádiz e a Constitución de 1812

HISTORIA DE ESPAÑA

PREGUNTA 2. ELABORE UNHA COMPOSICIÓN HISTÓRICA A PARTIR DOS TEXTOS PROPOSTOS.

Os seguintes textos deben permitirle facer unha redacción sobre as Cortes de Cádiz e a Constitución de 1812. Tendo en conta os documentos e o seu contexto, debe atender cando menos ás razóns para a convocatoria das Cortes en Cádiz, ás características dos deputados e aos aspectos esenciais da Constitución de 1812. (5 puntos)

Doc. 1. Declaración da constitución das Cortes, 24 de setembro de 1810:

“As Cortes xerais e extraordinarias da Nación española, congregadas na Real Isla de León, conforme en todo coa vontade xeral [...], recoñecen, proclaman e xuran de novo polo seu único e lexítimo Rei ao Señor don Fernando VII de Borbón; e declaran nula [...] a cesión da coroa que se di feita a favor de Napoleón, non só pola violencia que interveu naqueles actos inxustos e ilegais, senón principalmente por faltarlle o consentimento da Nación”.

Doc. 2. Composición social dos deputados das Cortes de Cádiz:

Condición	Número	%
Clero	89	29,5
Funcionarios e cargos	82	27,2
Avogados e profesións liberais	53	17,6
Militares	42	13,9
Nobres e propietarios	23	7,6
Comerciantes e industriais	12	3,9
Total	301	100

Fonte: QuintíCasals, La representación parlamentaria en España durante el Primer Liberalismo (1800-1836), Lleida, Universitat, 2014, p. 82.

Doc. 3. Título I da Constitución de Cádiz, «Da Nación española e dos españois»

“Artigo 1. A Nación española é a reunión de todos os españois de ambos os hemisferios. Art. 2. A Nación española é libre e independente, e non é, nin pode ser, patrimonio de ningunha familia nin persoa. Art. 3. A soberanía reside esencialmente na Nación, e polo mesmo pertence a esta exclusivamente o dereito de establecer as súas leis fundamentais. Art. 4. A Nación está obrigada a conservar e protexer por leis sabias e xustas a liberdade civil, a propiedade e os demais dereitos lexítimos de todos os individuos que a compoñen”.

Composición histórica: **As Cortes de Cádiz e a constitución de 1812** (ata 5 puntos)

Moi deficiente (0-1)	Resposta en branco (0) A resposta é unha paráfrase dos documentos (1)
Deficiente (1,5-2)	Contidos: Xeneralidades sobre a época (1,5). Uso dos documentos: a resposta prescinde dos documentos, expónse como a resposta a unha pregunta teórica (2). Redacción: texto no que abundan as imprecisións, palabras inventadas, frases incoherentes ou mal articuladas.
Aprobado (2,5-3)	Contidos: -Contextualizar a convocatoria a Cortes na rexencia establecida durante a guerra contra os franceses. -Mencionar os factores que levaron a que as Cortes se celebrasen en Cádiz (cidade que resistía o asedio francés) e as súas consecuencias a nivel político (substitución de moitos dos deputados escollidos nos diferentes territorios por representantes gaditanos, maioritariamente liberais). -Comentar as características das Cortes e as principais tendencias ideolóxicas dos deputados. -Principais características da constitución de 1812: soberanía, organización do poder, dereitos(sufraxio) e liberdades, relación Igrexa/Estado. Uso dos documentos: os documentos cítanse na redacción. Redacción: texto formalmente correcto, pero expresión demasiado simple.
Notable (3,5-4)	Contidos (ademais do esixido para o aprobado, afondar no comentario nalgunha das seguintes cuestións): -Mencionar o proceso de elección dos deputados (sufraxio universal masculino indirecto) e sinalar a presenza de representantes das colonias americanas. -Comentar as primeiras decisións adoptadas: recoñecemento como rei de Fernando VII, soberanía nacional, igualdade ante a lei. -Afondar nos trazos da carta constitucional: institucións que exercen cada un dos poderes do Estado, cámara única, organización territorial do estado, regulación da Milicia Nacional... Uso dos documentos (ademais do esixido para o aprobado, na composición úsanse os documentos para algunha das seguintes cuestións). -Empregar o contido do doc.1 na argumentación do comentario no referente ao recoñecemento de Fernando VII como rei e/ou o principio de soberanía Nacional. -Analizar a condición social dos deputados empregando os datos do documento 2. -Relacionar de xeito explícito algunha das características da constitución de 1812 cos artigos recollidos no doc.3. Redacción: correcta e texto coherente.
Sobresaliente (4,5-5)	Contidos (ademais do esixido para o notable no comentario recóllese unha ou varias das seguintes cuestións): -Detallar o proceso de convocatoria e constitución das Cortes: convocatoria inicial pola Xunta Suprema Central, mantemento da convocatoria polo consello de Rexencia (1810), reunión na Isla de León e traslado posterior a Cádiz (1811). -Incidir nas diferenzas esenciais entre o modelo político de Antigo Réxime e o liberal defendido polas Cortes (comparación do concepto de soberanía, a organización do poder, a organización social...). -Comentar a transcendencia política da Constitución e as dificultades atopadas para a súa implantación.

	Uso dos documentos (ademais do esixido para o notable, na redacción da composición o contigo dos documentos emprégase nalgúns destes sentidos): -Vincular a restauración da monarquía borbónica ao consentimento da nación, o que supón unha ruptura explícita co sistema político propio do Antigo Réxime (doc. 1). -Valorar o peso dos distintos grupos sociais entre os deputados de Cádiz, sinalando o destacado papel do clero e dos funcionarios e as consecuencias derivadas da súa presenza maioritaria (doc. 2). -Utilizar o artigo 1 para comentar a influencia do cambio de réxime no proceso de independencia das colonias americanas, os artigos 2 e 3 para subliñar as consecuencias políticas do recoñecemento da soberanía nacional ou o artigo 4 para enumerar os principais dereitos recollidos na Constitución de 1812. Redacción: correcta e precisa, facendo uso do vocabulario específico. O texto está ben articulado e argumentado.
--	---